



Broj: 02-01-302/25

Datum: 02.04.2025. god.

1185

PRIMLJENO:	03-04-2025	Redni broj:	1185
01	04	7589-2	

SKUPŠTINA KANTONA SARAJEVO

n/r Elvedin Okerić, predsjedavajući Skupštine Kantona Sarajevo

Predmet: Odgovor na Zastupničko pitanje, dostavlja se

Poštovani/a,

Vezano za pitanja iz zastupničke inicijative uvažene zastupnice u Skupštini Kantona Sarajevo, gospođe Mariele Hašinbegović, Javna ustanova „Djeca Sarajeva“ dostavlja odgovor na segmente inicijative za koje smatra da je nadležna i relevantna da se očituje.

1. Na pitanje: Na osnovu kojih zakonskih i podzakonskih akata se trenutno kreiraju jelovnici u predškolskim ustanovama, s obzirom na nepostojanje relevantnog pravilnika?

Javna ustanova „Djeca Sarajeva“ trenutno se u planiranju ishrane djece predškolskog uzrasta vodi „Smjernicama za zdravu ishranu djece uzrasta do tri godine“, koje je izradilo Federalno ministarstvo zdravstva. Ove smjernice predstavljaju stručni okvir koji koristi naša Ustanova u nedostatku posebnog pravilnika na nivou Federacije BiH ili Kantona Sarajevo koji bi preciznije uređivao ovu oblast.

Pored toga, Ustanova je dodatno unaprijedila proces planiranja ishrane angažovanjem nutricioniste, čije smo stručno mišljenje implementirali u naše jelovnike. Također, svjesni smo činjenice da se prehrana priprema za najmlađu populaciju, koja ima specifične prehrambene navike, te se svakodnevno suočavamo s izazovom da pronađemo optimalan balans između nutritivne vrijednosti i prihvatljivosti obroka za djecu.

U skladu s tim, iz jelovnika smo isključili visokoprocenirane proizvode poput salama, pašteta i viršli, te ih zamijenili obrocima koje sami pripremamo – poput namaza i pašteta na bazi ribe, mliječnih proizvoda i drugih nutritivno vrijednih namirnica. Na taj način se osigurava kontrolisan kvalitet, nutritivna vrijednost i bolja prihvatljivost od strane djece.

2. Na pitanje: Da li je izrada i odobravanje jelovnika prepušteno prehrambenom tehnologu i, ako jeste, na osnovu kojeg pravnog osnova?

U JU „Djeca Sarajeva“ zaposlena je osoba s visokom stručnom spremom koja je, između ostalog, uključena u segment planiranja ishrane. Ipak, važno je naglasiti da se izrada jelovnika ne prepušta isključivo jednoj osobi, već je to proces koji uključuje više strana:



prehrambenog tehnologa, nutricionistu (jelovnici koje smo zajedno izradili), menadžment ustanove i kuhari. Također, predstavnici vijeća roditelja su se konsultovali sa nutricionistima, od kojih su nakon pregleda jelovnika dobili pozitivne ocjene o nutritivnoj vrijednosti i kvaliteti obroka koji se serviraju djeci (prema izjavi roditelja sa kojim smo imali sastanak).

Smatramo da ovaj proces možemo i dalje unapređivati, što i kontinuirano činimo, ali pri tome se vodimo osnovnim principima – osigurati zdravstveno ispravnu, nutritivno vrijednu, ali i djeci prihvatljivu ishranu.

Prema dostupnim saznanjima, nijedan važeći zakonski ili podzakonski akt eksplicitno ne propisuje ko je tačno zadužen za kreiranje, odobravanje i kontrolu jelovnika u predškolskim ustanovama. Shodno tome, JU „Djeca Sarajeva“ trenutno ne planira izmjene internih akata u ovom segmentu, ali podržavamo mogućnost formaliziranja uloge nutricioniste kroz izmjene Odluke o pedagoškim standardima i normativima za predškolski odgoj i obrazovanje, što bi dodatno doprinijelo kvaliteti planiranja ishrane.

U dijelu inicijative u kojem su nabrojana zaduženja prehrambenog tehnologa, potvrđujemo da je navedeno tačno. Istovremeno smatramo da osoba koja je završila magistarske studije, pri čemu je izučavala i oblasti ishrane stanovništva, ima potrebnu stručnost i kompetencije za obavljanje ovog kompleksnog posla. U odnosu na ono što je praksa u mnogim drugim (posebno privatnim) ustanovama, vjerujemo da smo organizaciono i kadrovski značajno unaprijedili ovaj segment.

Ono što dodatno želimo istaknuti, a što smatramo posebno važnim, jeste činjenica da je ova zastupnička inicijativa usmjerena isključivo na rad JU „Djeca Sarajeva“, dok se potpuno zanemaruje pitanje kako se isti procesi odvijaju u privatnim predškolskim ustanovama. Smatramo da je takav pristup ne samo nepravedan, već i pomalo diskriminirajući prema roditeljima i djeci koja pohađaju privatne vrtiće, a samo informacije rade privatne vrtiće pohađa duplo više djece u odnosu na vrtiće JU Djeca Sarajeva, a koje su takođe subvencionirane iz budžeta KS.

Naime, JU „Djeca Sarajeva“ ima sistemski uređen proces planiranja i nadzora ishrane, ima zaposlenog prehrambenog tehnologa, sarađuje s nutricionistima, konsultuje roditelje i radi u skladu s važećim stručnim smjernicama. Postavlja se pitanje – ko taj posao radi u privatnim vrtićima, po kojim kriterijima i uz kakvu stručnu podlogu? Da li ti subjekti imaju osoblje koje posjeduje relevantna znanja i iskustvo? Ko kontroliše kvalitet i nutritivnu vrijednost obroka koji se tamo serviraju djeci?

Smatramo da bi inicijativa koja za cilj ima unapređenje ishrane djece trebala obuhvatiti sve predškolske ustanove podjednako, bez obzira na njihov oblik vlasništva. Jedino na taj način



možemo govoriti o jednakim standardima, sistemskom pristupu i stvarnoj brizi o zdravlju sve djece na području Kantona Sarajevo.

Ovdje ističemo važnost segmenta sigurnosti hrane, koji je u našoj ustanovi sistemski uređen. Nakon određenih izazova iz prošlosti, ustanovljen je sistem upravljanja sigurnošću hrane u okviru kojeg prehrambeni tehnolog ima ključnu ulogu. Vjerujemo da je to, uz kvalitetnu ishranu, najvažnije roditeljima djece koja pohađaju našu ustanovu.

Poseban segment kojem JU „Djeca Sarajeva“ posvećuje izuzetnu pažnju odnosi se na pripremu hrane za djecu sa specifičnim prehrambenim potrebama, uključujući alergije, intolerancije na određene namirnice te druge medicinski indicirane dijetetske režime. Broj djece s ovakvim zahtjevima iz godine u godinu raste, što dodatno potvrđuje potrebu za profesionalnim i pažljivo organiziranim pristupom planiranju i pripremi ishrane u predškolskim ustanovama.

Ustanova je razvila sistem koji omogućava individualizirani pristup, uz striktno poštivanje preporuka ljekara i nutricionista za svako dijete pojedinačno. Osoblje u kuhinjama je educirano kako bi se izbjegla unakrsna kontaminacija, vode se zasebne evidencije o specifičnim režimima ishrane, a komunikacija sa roditeljima je kontinuirana i transparentna.

Ovaj aspekt našeg rada predstavlja dodatni pokazatelj ozbiljnosti i odgovornosti kojom pristupamo ishrani djece u našoj ustanovi. Uvođenje posebnih procedura za ovakvu vrstu prehrambenih potreba zahtijeva dodatne napore, organizaciju i stručnost, ali ih s ponosom provodimo jer smatramo da svako dijete, bez obzira na zdravstvene ili prehrambene izazove, zaslužuje siguran, kvalitetan i prilagođen obrok.

Na kraju želimo istaknuti da JU „Djeca Sarajeva“ u proteklom periodu nije zaprimila pritužbe roditelja koje bi ukazivale na nezadovoljstvo kvalitetom ili organizacijom ishrane u našim vrtićima. Smatramo da je to dodatna potvrda da ovim izuzetno važnim segmentom upravljamo na odgovoran, organiziran i kvalitetan način.

U slučajevima kada su postojale pojedinačne sugestije ili sporadične primjedbe, iste su odmah razmotrene, a eventualni problemi uspješno i blagovremeno riješeni u komunikaciji s roditeljima i drugim relevantnim akterima. Dokaz našeg otvorenog pristupa saradnji ogleda se i u činjenici da smo odmah nakon uspostavljanja novog saziva Vijeća roditelja održali zajednički sastanak, na kojem su njihovi prijedlozi i primjedbe saslušani s posebnom pažnjom, te su u skladu s trenutnim mogućnostima implementirani u planiranje i organizaciju ishrane.



Bosna i Hercegovina
Federacija Bosne i Hercegovine
KANTON SARAJEVO
Javna ustanova «Djeca Sarajeva»
SARAJEVO

Upravo takav pristup – otvorenost za dijalog, kontinuirano unapređenje i stručna odgovornost – predstavlja temelj na kojem gradimo sistem ishrane u našoj Ustanovi, u najboljem interesu djece.

Spoštovanjem,



DIREKTOR

[REDACTED]
Ilda Bekrić